

Concert d'advent dil Chor Mischedau Grischun Turitg

■ Igl ei puspei aschi lunsch. Sin mesjamna, ils 3 da december envida il Chor Mischedau Grischun Turitg a siu concert d'advent en la baselgia dils predicaturs/Predigerkirche a Turitg. La preparaziun da quel ha entschiet gest suenter il concert primavaun digl avrel vargau. Duront la fin d'jamna da cant l'entschatta da november sin «l'insla da musica», in part dall'insla claustrala da Rheinau, ha dirigent Remo Weishaupt luvrau e mulau da miervi vinavon cun las ovras da differents genres.

In ferm sustegn ha il chor survegniu dalla pianista Daniela David che ha fatg part dalla fin dall'jamna da cant. Suenter sia scolaziun da scolasta primara ha ella studegiu cant e concludiu cun il diplom da concert. Gia baul eis ella s'interessada per il cant coral (Chorgesang) e perquei absolvu il studi da dirigenta. Sper igl accompignament dallas canzuns al clavazin vegn Daniela David ad embellir il

concert cun differents arranschaments da clavazin.

Il cumponist roial

Ina buna part dil concert secumpona da canzuns digl enconuscent cumponist e dirigent engels John Rutter. El ha studegiu musica al Clare College a Cambridge ed ei staus dals 1975 entochen 1979 sez leu directur da musica. Cun il chor Cambridge Singers ch'el ha fundau 1981 eis el vegnius renomaus per sias composiziuns e registraziuns sin dc. Rutter vala per in dils pli impurtants e populars cumponists da musica sacrala e corala. Musicalmeinsan ins allorca el en la moderna tardiva. Ina harmonia complexa e ritmica che cumpeggia era elements da jazz e gronda variaziun da melodias dattan alla musica da Rutters ina forza suggestiva. El ei era daventaus enza tgei sco cumponist dalla cuort roiala. Aschia ha el saviu cumponer la musica per il giubileum dad aur dalla regina Eli-

sabet ed il psalm festiv per las nozzas da prenci William e Catherina Middleton.

Dirigent Remo Weishaupt ha eligiu in triep da quellas canzuns adattadas per il chor e translatau ed adaptau ils texts en romontsch. Las canzuns ein ualti preten-siusas. Schibein ritmus sco harmonias ni disharmonias basegnan in pulit engaschi da tuttas varts entochen ch'ei «sesa». Mo lu plaian ei adina dapli e francamein van ei lu cra a cor al publicum da concert.

Advent e Nadal

Canzuns romontschas cun la tematica dil misteri da Nadal e talas che espriman l'atmosfera dil temps denter advent ed entschatta digl onn niev enraman il program da concert. Denter auter La nona fila, Curò Mani/Jon Guidon; Canzun dil bien pastur, Duri Sialm/Carli Fry; Nadal, Carli Scherrer/Giusep Cathomas; Dorma o Bambign, pop./arr. G. G. Derungs cav.

Els texts dallas canzuns specificamein

d'advent entupein nus tut ils simbols tradiziunals en connex cun il schinumnu misteri da Nadal. La steila, il stgir, il freid, la stalla, il pursepen, la mumma che ha parturiu, igl affon sil strom, il cant dils aungels, ils pasturs, la pasch annunziada per tuts. Simbols per in misteri cun il qual la plipart da nos contemporans han difficultads. Tgi ughegia aunc da mirar si el tshiel dallas steilas e quintar cun pasch per tuts en in mund nua ch'ei ha strusch enzacu dau tons camps da bat-taglia sco gest ozildi? E tonaton ein gest quei ils simbols per il carstgaun che vul mirar sur sesez e siu pign mund ora. Per anflar direcziun e per s'encorscher tgei che va dretg e seniestar. Ils pasturs han capiu la nova, buc ils pussents.

Il concert ha liug mesjamna, ils 3 da december allas 19.30 en la baselgia dils predicaturs/Predigerkirche, Zähringerplatz, 8001 Turitg. Tram 4 e 15 entochen Rudolf-Brun-Brücke.

Ciril Berther



Il Chor Mischedau Grischun Turitg a caschun dil concert primavaun igl avrel 2014.

FOTO G. RIEDI